

Тйляд книга жажыяды

Роман пумысь зырдыт вераськон

29-тй толшоре Йоскалык лыдзетюртын Ульфат Бадретдиновлэн «Туннэ – чюказелэн кутсконэз» романэз пумысен кенешон ортчиз.

Озы ик ужрад та библиоте-каысь «Край удмуртский» клублэн ужаны кутскемез дырысен 50 ар тырмонэзлы сйземын вал. Клублэн нырысетй пумиськонэз 1984-тй арын 26-тй толшоре ортчез. Со удмурт кылбурчилы но азыветлйсьлы, Вотской автономной областез кылдытйсьлы Максим Прокопьевич Прокопьевлы сйземын вылэм.

Ульфат Шайхутдиновичлэн но «Туннэ – чюказелэн кутсконэз» романаз Максим Прокопьевлэн образэз азыпал радэ потэ. Романэзлэсь пушсузъетсэ автор тунсыко радъям. Кылбурчилэн образэз магический реализм амалэз кутыса суредамын. Озы ик произведениын Кам съорын улйсь удмуртъяслэн диаспоразы сярись сюлэмшуго малпаськонъяс жутэмын.

Ужрадын роман пумысен малпанъяссэс веразы литература удысысь тодосчиос, журналистъяс, туалалитератураен тунсыкъяськисъяс.



Писатель У.Ш. Бадретдинов

«Максим Прокопьев али улйсьсэ понна бадзым синпелетлы тупа, нош романын со зэмос адыми, яратыны быгатйсь воргон, калык понна сюлмаськись азыветлйсь сямен возматэмын», – вераз Удмурт Элькунысь Кун Кенешлэн тюроезлэн воштйсез Татьяна Витальевна Ишматова.

«Максим Прокопьев улоньыс вазь кошкис. Со сярись материал трос өвёл. Та роман – Ульфатлэн подвигез», – будэтйз филологи наукаосъя кандидат Александр Григорьевич Шкляев.

Жыт туж шуныт ортчиз. Максим Прокопьев сярись роман пушкын бугыръяськыса вераськон но туж тунсыко пормиз.

Ольга МОСКВИНА

Туспуктэм писательлэн «ВКонтакте» бамысьтыз басътэмын

Пичи чупыргы

Портмаським шулдыр



Коркась корка портмаськыса ветло вожояськон дыре. Нош ми нылпи садамы ог-огмы доры котькуд группалэн урамьсь шудон азбаръестйз ветлймы. Нылпиосын чюш анай-атайяс но мыло-кыдо пырыськызы. Одыгъёсыз дорын круген шудонъясын шудймы, колядкаос кырзамы. Мукут азбарын кузё кышно чужонъясын но канатэн вожвылъяськон радъяз. Шудймы но, тунаським но, люкаськем кампет, печенняенымы чай но юимы.

Любовь ЗЫЛЕВА,

Ижкарысь 32 номеро нылпи садаыс валтйсь визьнодась. Туспуктэмез Ирина СОРОКИНАЛЭН

Гожтэтысь чуръёс

Ижкарысь 60 номеро школарысь 7-тй «В» классын дышеткись пинальёслэн ужъясы

Нырысьсэ сцена вылын кырзай

Миям школаямы арлы быдэ толсуре кунсьор кырзанъяслы сйзем фестиваль ортче. Отчы пырысько 5–11-тй классъясын дышеткисъяс. Туэ англи, немец но француз кырзанъяс чузъяськызы.

Мон немец кылэз дышетйсько, соин ик эшъясыным «Танец маленьких утят» кырзанэз немец кылын быдэстймы. Дасьяскыны милемлы юрттйз немец кылъя дышетйсьмы Надежда Борисовна Минеева. Мон туж тулкымъяськи сцена вылэ тубыкум, эшшо огнам нылъяс пöлын вал. Микрофонэз киям кутэме бере куарае но огдырлы ышылыз кадь. Залын чабыны кутскемзы бере гинэ буйгатски но ганяк шокчи. Кылъяссэ кырзанлэсь умой дышетй бере, сюлмысь кырзай. Тйни озы мон нырысьсэ сцена вылэ пöтай.

Егор ТРУХИН

«Зечбур!»-лы гожтэт

Зечбур, «Зечбур!»! Гожтэ тыныд Вадим. Мон тонэныд кылем арын 6-тй классын тодматски. Дышетйсьмы Елена Николаевна Ямщикова тодматйз но газетлы гожтйськыны лөпкытйз. Ми удмурт кылъя урокъясамы газетэз ужамы чөм кутйськомы. Мынам вераме потэ аслам хоббие сярись. Мон тунсыкъяськисько крезьгурен, кылбуръяс гожъяны тыршисько, соослы крезьгур малпасько. Мынам аслам каналэ но вань. Куке мылкыды алама луэ, мон кырзанъясме нёжъясько. Эшшо мон машинаосын но мотоциклъясын тунсыкъяськисько. Тйяськемъяссэ лэсьтыны дышеткисько, малпасько, азыланяз со мыным туж кулэ луоз. Аресэ тырмиз ке, одно ик автошколае дышетскыны мыно. Гужем мотоциклэн ширтылй ни. Дышетскон мыным капчиен уг сөтйськы ке но, мон тыршисько. Тйни сыче ужъясы. Зеч лу, «Зечбур!». Пумиськытозь.

Вадим КОЛОТОВ

Шумпотон кузьмазы

Кылем аре толсуре эшъясыным удмурт ёлкае ветлй. Ортчиз со Калыкъяслэн эшъяськон юртазы. Отчы люкалъязы Ижкарысь удмурт кылэз дышетйсь нылпиосты. Ми понна «Шунды» огазьяськоньыс азыветлйсьсэ тунсыко конкурсьсэ но «Шедьты Тол бабаез» квест радъязы. Ми вань дасям курунъясты быдэстймы но дорамы Тол бабай вуиз. Ческыт кампетъяс но удмурт выжыкылъясын книга кузьым вайиз. Собере кутскиз дискотека. Милемлы ваньмылы туж кельшиз ужрад. Мон улоскуспо веб-квестэ но удмурт олимпиадае пырыськи но призовой инты басътй, со понна быгатй сюрыны удмурт ёлкае. Бадзым тау «Удмурт Кенеш» огазьяськонлы милемлы тае праздник радъямзы понна.

Тимур ИЛЮШИН

Яратоно толэзе

Тани вуиз арлэн туж кезыт дырыз – толалтэ. Омыр кезыт но сайкыт. Куазь умой, кезытэз 15–20 градус. Нуналъяс шундыё но, шундытэм но луо. Котыр тöды лымы кылле чилыса. Уйёс толалтэ кузесь, нуналъяс вакчиесь. Дыр шедьтйськом эшъясын куасэн но конькиен нискыланы, лымымунё лэсьтыны. Мон туж яратйсько Виль арез пумитаны, чеберъям кыз котырын шулдыръяськыны. Соку быдэсмо паймымон но паймытйсь малпанъяс.

Стас ЛАЗАРЕВ, 6-тй класс. Юськи школа, Дэри ёрос